

# HEIMAT

000589 697 09

T-050052978-1

C&A Rohrer Daniel IPI 00072 97 75 37

I dänke zrügg, und i bsinne mi, a die Zyt, wo n i no Chind bi gsy  
Wo d Wält soooo gross isch gsy, un ig no soooo chly!  
Won i ha Bisons gjagt uf der Prärie, wo zwüsche beidne Wohnblöck isch gsy  
Wo "Lassy", "Winnetou" und "Fury", weisch no, sy üsi Fründe gsy  
D Anita isch mys Schätzi gsy, u drum isch d Bärble nydisch gsy  
My Wäut isch denn no ganz gsy, ganz klar, i bi daheime gsy!

Heimat, Heimat, wo bisch du häre choo?  
Heimat, Heimat, uuf u dervoood  
Heimat, Heimat, es isch geng Fröhlig gsy  
Heimat, Heimat, ha tänkt, s duuri ewig so

Später de, verjagt us em Paradies, hei mer Öpfel gfrässe bis zum Dünnschiss  
Total bireweich symer denn gsy, aber stei-hert, geng derby  
Glücklech symer scho lang nümme gsy, hei immer müesse "stoned" sy  
Mit "Kiff" u mit chli "LSD©" hei mer kämpft für d Anarchie  
Hei gfunge s syg e Schweinerei, u du symer uszoge, dehei  
U es het üs tünt, di Wält syg chly, u mir syge derfür ganz gross derby!

Heimat, Heimat, was hei si mit dir gmacht?  
Heimat, Heimat, zur Sou, mit ihrer Macht  
Heimat, Heimat, e heisse Summer, isch es gsy  
Heimat, Heimat, du bisch nümm umegsy!

U ei Nacht ga n i ga spaziere, alei eme Fluss entlang, bim Mondschn  
Und i louffe vorwärts, zimlech wyt, där mängi Gass hallet my Schritt  
U n i tröime so chli vor mi hi, tröime u merke's gar nid  
Dass es Herbscht isch worde derby, i louffe wyter u cha's nid la sy  
U plötzlech isch alles häll u klar, d Wäut isch gross u wunderbar  
U d Wält bisch du, u d Wält bin ig, u plötzlech, bin i wider da, deheim

Heimat, Heimat, bisch ändlech umecho  
Heimat, i mir inne, han i di mitgnoh  
Heimat, Heimat, s geit nid ume ne Bitz Land  
Heimat, Heimat, Septämber in Leningrad  
Heimat, Heimat, i bi zimlech umecho  
Heimat, Heimat, ha so mänge Wäg unger d Sohle gnoh  
Heimat, Heimat, aber i allne Gasse hallet's glych  
Heimat, Heimat, octobre à Paris  
Heimat, Heimat, s geit vil wyter als bis zum Gartezuun  
Heimat, Heimat, un es füllt vil meh als nume Ruum  
Heimat, Heimat, eso weich, so bequem  
Heimat, Heimat, Novämber in Jerusalem  
Heimat, Heimatland, nomal  
Heimat, Heimat, itz begryff's doch ändlech mau  
Es geit nid um d Dicki vo dym Portemonnaie, es geit nid um weniger, u nid um meh  
Es geit nid um d Farbe vo dyre Hut, mängisch isch es lyslig u mängisch lut  
Heimat, Heimat, genau di suechen ig,  
Heimat, Heimat, u derby stecksch du doch Zmitts i mir,  
Heimat, Heimat, mängisch bisch du wien es Lied,  
Heimat, Heimat, u mängisch ghören i di nid...

